



NEGERI PERAK

Warta Kerajaan

DITERBITKAN DENGAN KUASA

GOVERNMENT OF PERAK GAZETTE

PUBLISHED BY AUTHORITY

Jil. 60
Bil. 2

30hb Januari 2007

*TAMBAHAN No. 2
PERUNDANGAN*

Pk. P.U. 3.

ENAKMEN PENTADBIRAN AGAMA ISLAM (PERAK) 2004

FATWA DI BAWAH SEKSYEN 37

BAHAWASANYA Jawatankuasa Fatwa, pada menjalankan kuasanya di bawah seksyen 36 dan seksyen 37 Enakmen Pentadbiran Agama Islam (Perak) 2004 [*Enakmen 4 tahun 2004*], telah menyediakan fatwa yang terkandung dalam ini:

DAN BAHAWASANYA menurut seksyen 37 Enakmen yang sama, Duli Yang Maha Mulia Sultan Perak Darul Ridzuan telah memperkenankan penyiaran fatwa ini dalam *Warta dan Kerajaan Negeri* telah dimaklumkan tentang fatwa ini:

MAKA, OLEH YANG DEMIKIAN, pada menjalankan kuasa yang diberikan oleh seksyen 37 Enakmen Pentadbiran Agama Islam (Perak) 2004, Jawatankuasa Fatwa, dengan perkenan Duli Yang Maha Mulia Sultan, membuat dan menyiarkan fatwa yang berikut:

1. Bahawa ajaran Arifin bin Muhamad (Ayah Pin) ialah ajaran yang menyeleweng daripada ajaran Islam sebenar, sesat dan syirik kerana ciri-ciri yang menyeleweng seperti yang berikut:

(a) **dari aspek akidah—**

- (i) Ayah Pin sebagai Tuhan yang turun dari langit dan kerajaan langit adalah di bawah kekuasaannya;
- (ii) Ayah Pin mempunyai kuasa menyembuh segala penyakit dan sebutan namanya boleh menakutkan binatang buas;
- (iii) Ayah Pin mendakwa Mekah, Kaabah dan Air Zam-Zam adalah miliknya dan dibina selepas mendapat wahyu dari langit;

- (iv) Ayah Pin mempunyai kuasa menjadikan manusia menjadi batu melalui sumpahnya, mengetahui perkara ghaib, boleh menentukan syurga dan neraka seseorang, mendakwa roh orang yang mati jahat akan dikurung dalam kubah markaz;
- (v) menolak berlaku kemusnahan dunia ketika qiamat;
- (vi) seseorang Islam itu perlu menjadi kafir dahulu;
- (vii) menolak kepentingan mengucapkan dua kalimah syahadah di akhir kematian anak Adam;

(b) dari aspek syariah—

- (i) menolak rukun Islam dan hukum syarak' berkaitan dengan Tuhan;
- (ii) menolak rukun-rukun Islam termasuk kewajipan sembahyang lima waktu, puasa di dalam bulan Ramadhan, zakat dan ibadah haji;
- (iii) menghalalkan makanan yang diharamkan oleh syara';
- (iv) mengada-adakan hukum syara' seperti nikah batin;

2. Semua dakwaan di atas mengandungi ajaran, pegangan dan fahaman yang bertentangan dengan akidah dan syariah Islamiah serta boleh mengelirukan dan menyesatkan masyarakat Islam dan dengan ini adalah diharamkan.

3. Kumpulan Ayah Pin yang berpegang kepada ajaran, pegangan dan fahaman yang didakwa oleh Arifin Muhamad adalah diharamkan.

4. Oleh itu, orang Islam dilarang mengamalkan ajaran, pegangan dan fahaman Kumpulan Ayah Pin, menjadi ahli, mengetuai, memimpin, memberikan ceramah, mengadakan kelas pendidikan dan pembelajaran, mengadakan aktiviti-aktiviti ekonomi, sosial dan aktiviti-aktiviti lain yang bertujuan untuk menghidupkan dan mengembangkan kumpulan ini. Orang Islam juga dilarang memiliki, menyimpan, mencetak, menjual termasuk mengedarkan, risalah dan apa-apa dokumen yang menggunakan sebarang bentuk lambang, rajah atau tanda yang boleh dikaitkan dengan Kumpulan Ayah Pin, menggunakan sebarang bentuk lambang, rajah atau tanda pada mana-mana harta alih atau tak alih yang boleh dikaitkan dengan Kumpulan Ayah Pin.

5. Sebarang bentuk sokongan dan bantuan kepada Ayah Pin dan / atau pengikut-pengikutnya dilarang dan hendaklah dihentikan serta-merta.

6. Orang Islam yang mengamalkan ajaran Arifin bin Muhamad (Ayah pin) adalah *murtad*.

Bertarikh 24 Januari 2007

[MNPk: A351 1ST/01/7(72); PU.Pk. 07/2001]

Dengan Titah Perintah Duli Yang Maha Mulia Sultan

DATO' SERI (DR) HAJI HARUSSANI BIN HAJI ZAKARIA
*Mufti dan Pengerusi Jawatankuasa Fatwa
Negeri Perak Darul Ridzuan*